



六朝事迹編類
二

ル 5
I193
2



門九 1193 卷 2
門九 1193 卷 2



六朝事迹編類卷之二

左奉議郎充江南東路安撫司幹辦公事張敦頤養正謹

形勢門

鍾阜建康之東餘見寺苑門蔣山寺

圖經云在縣東北周回六十里高一百六十八丈
東連青龍山西臨青溪南自鍾浦下入秦淮北接
雒亭山漢末有秣陵尉蔣子文逐盜死於鍾山吳
大帝為立廟封曰蔣侯吳錄云大帝祖諱鍾因改
名曰蔣山按丹陽記云京師南北竝連山嶺而蔣
山岩崑巖異其形象龍實作揚都之鎮諸葛亮嘗
至京觀秣陵山阜云鍾山龍盤蓋謂此也又按輿
地志云鍾山本少林木宋時使諸州刺史罷職還



者栽松三千株下至郡守各有差焉山之最高峯地有五願樹樹柞木也宋元嘉中百姓祈禱率有應驗寰宇記云自梁以前立寺七十所今存者六又按南史宋散騎常侍劉劭經始鍾嶺之南以爲栖息聚石蓄水朝士雅素者多從之遊又雷次宗元嘉中開館雞籠山文帝爲築室於鍾山西巖下謂之招隱館至齊周顒亦於鍾山西立隱舍休沐則歸後顒出爲海鹽令孔稚圭作北山移文以譏之舊經云晉謝尚齊朱應吳苞孔嗣之梁阮孝緒劉孝標竝隱於此唐大厯中處士韋渠牟亦隱此山號遺名子顏真卿題其所隱之室曰遺名先生三教會宗堂又陳後主與張機遊是山嘗以松枝

代塵尾故梅執詩有千松塵尾之句又按文選沈休文鍾山應教詩云靈山紀地德險峭資岳靈又云勢隨九疑高氣與三山壯蓋美之也荆公絕句云偶向松關覓舊題野人休誦北山移丈夫出處非無意猿鶴從來自不知又一絕云澗水無聲遶竹流竹間花影弄春柔茅檐相對坐終日一鳥不鳴山更幽又一絕云終日看山不厭山買山終待老山間山花落盡山長在山水空流山自閒今屬惟政鄉去縣十里

石城建康之西

吳孫權沿淮立柵又於江岸必爭之地築城名曰石頭常以腹心大臣鎮守之今石城故基乃揚行

密稍遷近南夾淮帶江以盡地利其形勢與長干山連接輿地志云環七里一百步在縣西五里去臺城九里南抵秦淮口今清涼寺之西是也諸葛亮論金陵地形云鍾阜龍盤石頭虎踞真帝王之宅正謂此也及晉伐吳王濬以舟師沿江而下自三山抵石頭劉夢得金陵懷古曰王濬樓船下益州金陵王氣黯然收千尋鐵鎖沈江底一片降幡出石頭荒苑至今生茂草古城依舊枕寒流而今四海歸皇化兩岸蕭蕭蘆荻秋宋順帝昇明元年以司徒袁粲出鎮於此由晉以來常爲戰守之地左太冲吳都賦云戎車盈於石頭蓋謂此也宋大明中以其地爲離宮及齊武帝爲世子即以爲世

子宮城之東有巨石俗呼爲塘岡乃王敦害周伯仁戴若思之處按建康實錄晉元帝永昌元年敦收周顛戴淵殺於石頭城東塘頽石上百姓冤之至今紀其處至陳宣帝大建二年其城復加修築以貯軍食後主禎明元年徐孝克爲都官尚書性清素常以石頭津稅給之唐武后光宅中徐敬業舉兵使其徒崔洪渡江修石頭以拒之敬業平分軍三百人守之尋置爲鎮仍徙縣倉以實之故唐書地理志云昇州有石頭鎮中宗神龍二年廢鎮即移倉於冶城德宗時浙江觀察使韓滉迺於石頭築五城今遺址尚在江南野史汪台符上書陳民間九患爲宋齊丘所沮後齊丘使人夜縛其口

沈石城下先主聞而歎之江淹侍始安王石頭城
詩曰開局遶天邑襟帶抱尊華何遜登石頭詩曰
天暮遠山青潮去邊沙出皆謂此也

朱雀航

晉咸康二年作朱雀門新立朱雀浮航在縣城東
南四里對朱雀門南渡淮水亦名朱雀橋輿地志
云吳南津大航橋也王敦作亂温嶠燒絕至是始
用杜預河橋法作之地志云朱雀門孔對吳都城
宣陽門相去六里爲御道夾御溝植柳自朱雀門
南渡出國門羅鄴金陵野步望宮柳詩云色承陽
氣暖陰帶御溝清里俗相傳今桐樹灣相對即其
地也

真武湖

按建康實錄吳後主皓寶鼎元年開城北渠引後
湖水流入新宮巡遶殿堂窮極伎巧至晉元帝始
創爲北湖故實錄云元帝大興三年創北湖築長
隄以遏北山之水東至覆舟山西至宣武城又按
南史宋文帝元嘉二十三年築北隄立真武湖於
樂遊苑之北湖中亭臺四所後黑龍見於湖側春
秋使道士祠之至孝武大明五年常閱武於湖西
七年又於此湖大閱水軍按輿地志云齊武帝亦
常理水軍於此號曰昆明池故沈約登覆舟山詩
南瞻儲胥館北眺昆明池蓋謂此也又於湖側作
大竇通水入華林園天淵池引殿內諸溝經太極

殿由東西掖門下注城南墜故臺中諸溝水常滌
流迴轉不舍晝夜又按南史元嘉二十三年造真
武湖文帝欲於湖中立方丈蓬萊瀛洲三神山尚
書右僕射何尚之固諫乃止今圖經云湖中有蓬
萊方丈瀛洲三神山不知何所據也本朝天禧四
年改爲放生池其後廢湖爲田中開十字河立四
斗門以洩湖水跨河爲橋以通往來今城北十三
里有古池俗呼爲後湖見作大軍教場處是也

六朝事迹編類卷之二終

光祿寺署正上元李濱古漁重校刊

六朝事迹編類卷之三

左奉議郎充江南東路安撫司幹辦公事張敦頤養正譔

城闕門

越城

春秋時越既滅吳盡有江南之地於是築城江上
以鎮江險圖經云周回二里八十步在秣陵縣長
千里後崔慧景寇建業蕭懿入援自采石濟岸頓
越城舉火臺上鼓噪相慶茲建業之南也今南門
外有越臺與天禧寺相對見作軍寨處是也

金城

建康實錄金城吳築晉桓溫咸康七年出鎮江乘
之金城後溫北伐經金城見爲琅琊時所種柳皆

十圍因歎曰木猶如此人何以堪因攀枝執條泣然流涕揚修之金城詩亦引此爲據又按古圖經晉中宗於金城立琅琊郡温嘗爲琅琊內史至咸康七年出鎮金城前云琅琊蓋指此也今去府城三十五里

冶城

今天慶觀即其地也本吳冶鑄之所因以爲名寰宇記晉元帝大興初以王導疾久方士戴洋云君本命在申而申地有冶金火相爍不利遂移冶城於石頭城東以其地爲園徐廣晉記云成帝適司徒府觀冶城園即此也

臺城

建康實錄晉成帝咸和七年新宮成名建康宮注即今之所謂臺城也在縣東北五里周回八里又按輿地志云同泰寺南與臺城隔路今法寶寺及圓寂寺即古同泰寺之基故法寶寺亦名臺城院以此考之法寶圓寂二寺之南蓋古臺城地也今之基址尚在元和初陸喬家於丹陽一夕有叩門者曰我沈約也呼左右召青箱來俄一兒至約指謂曰此吾子也近從吾過臺城命爲感舊詩因諷曰六代舊山川興亡幾百年繁華今寂寞朝市昔喧闐夜月瑠璃水春風卵色天傷時與懷古垂淚國門前揚修之有詩云六朝遺跡好山川宮闕灰寒草樹煙江令白頭歸故國多情合賦黍離篇

琅琊郡城

寰宇記云晉元帝過江為琅琊國人立也其城在江乘縣界王隱晉書及山謙之南徐州記云江乘南岸蒲州岸有琅琊城其地立琅琊內史以治之圖經云在縣東北六十三里今句容縣有琅琊鄉亦其地也又按寰宇記齊武帝永明六年移琅琊郡於白下在縣北十八里圖經直以蒲州津城為白下非也又按南史武帝永明六年於琅琊城講武習水步軍九年又幸其城講武觀者傾都梁徐欽業登琅琊城詩曰表裏窮形勝襟帶盡巖巒登陴起遐望回首見長安

建康縣城

寶章閣藏版

吳冶城東今天慶觀東是其地寰宇記云在縣西一里晉太康三年分淮水北為建康縣上元之地居多

同夏縣城

南史梁武帝以宋孝武大明元年生於秣陵縣同夏里三橋宅及即位大同元年分同夏縣寰宇記云在城東十五里其地在長樂鄉

白下縣城

按圖經及寰宇記引輿地志云本江乘之白石壘也齊武帝以其地帶江山移琅琊居之唐武德元年罷金陵縣築城於此因其舊名曰白下正觀七年復舊治此地遂廢今攷唐書地理志云武德三

年更江寧縣曰歸化八年更歸化曰金陵九年更金陵曰白下隸潤州正觀九年復更白下曰江寧前說興廢本末與此不同宜以唐史爲正又按南史齊武帝欲修白下城難於動役劉係宗啟謫役在東民丁隨唐寓之爲逆者上從之後武帝講武白下履行其地曰係宗爲國家得此一城圖經云在西北十四里今靖安鎮北有白下城故基父老傳云即此地也屬金陵鄉去府城十八里

臨沂縣城

按輿地志云晉成帝咸康三年分江乘縣置臨沂縣屬琅琊郡陳亾遂廢在府城北三十里

檀城

輿地志云本謝玄之別墅太傅謝安與玄奕棋所勝者至宋屬檀道濟故名檀城圖經云在縣東八里今按建康實錄在墅城東八里非去縣八里也地圖謂之城子墅今清風鄉有城子墅在黃城橋之西即其地去府城四十里

蔣州城

杜佑通典隋平陳於石城置蔣州寰宇記輔公祏據江東用爲揚州唐趙郡王孝恭平公祏又於其城置揚州大都督後徙揚州於廣陵此城遂廢

吳固城

圖經云在溧水縣西南九十里高一丈五尺羅城周回七里二百三十步子城一百一里九十步勝

公廟記吳時瀨渚縣也楚靈王與吳戰吳兵不利遂陷此城吳乃移瀨渚於溧陽南十里改爲陵平縣靈王崩平王立使蘇迺爲將戰於吳吳軍敗收吳陵平縣改爲平陵縣自平王聽費無忌佞言伍員奔吳闔閭用爲將舉兵破楚奔南海固城宮殿逾月煙焰不滅其城遂廢

石闕

縣北五里有四石闕在臺城之門南高五丈廣三丈六寸梁武帝所造及成命朝士銘之時陸倕字佐公其文甚佳士流推伏侯景作亂焚燒宗廟城郭府寺百無一存尋高麗百濟等國人貢見其凋殘遂哭於闕下楊修之有詩云雙石巍巍慰眼青

寶章閣藏版

滿朝珍重佐公銘宮城府寺俱灰燼翻使夷人謾涕零

朱雀門

晉都城南門也按晉書新宮立三門於南面正中曰宣陽與朱雀門相對王導嘗出宣陽門望牛首山兩峯相向導指爲天闕牛首山在今城南門近東面勢正與桐樹灣相對以此地攷之在今上元南廂也

白下門

兩漢地理志未有白下縣按南史宋明帝時聞人謂宣陽門爲白門以爲不祥甚諱之右丞江謚誤犯帝變色曰白汝家門按唐會要及地理志武德

二年更江寧曰歸化八年又更歸化曰金陵九年更金陵曰白下正觀九年又更白下曰江寧則白下縣始於此然未知其得名之因一說謂春秋時楚使子木之子勝處吳邑爲白公攷金陵吳邑也恐白之得名自此始一說謂本江乘縣之白石壘以其地帶江山之勝故爲城於此曰白下城東門謂之白下正其往路也一說謂齊武帝時已闕武於白下自唐武德以後因之也荆公東門詩有東門白下亭之句參寥訪荆公詩曰苦嫌榮祿早收身歸與漁樵共隱論白下門西山迤邐興來長是岸烏巾徐師川詩曰廣陵纔過又金陵白社還思白下亭鴈翅水連千里浪蛾眉山出兩峯青正謂

此也

丹陽門

丹陽丹楊丹徒各自有義按前漢志秦彰郡乃漢丹陽郡武帝二年更名也九域志引江南地志云漢丹陽郡北有赭山丹赤故因名曰丹陽至東晉始以丹楊爲義按地理志建業秣陵丹楊句容溧陽江寧皆隸丹楊郡屬揚州所統注云丹楊山多赤柳在郡西故曰丹楊丹徒春秋時謂之朱方按建康實錄孫權鎮京口注曰秦始皇發赭衣刑徒伐山開道故名邑曰丹徒

六朝事迹編類卷之三終

光祿寺署正上元李濱古漁重校刊

六朝事迹編類卷之四

樓臺門 亭館附
左奉議郎充江南東路安撫司幹辦公事張敦頤養正誤

落星樓

圖經云在縣東北臨沂縣前吳大帝時山上置三層樓樓高故以此為名左太冲吳都賦云饗戎旅乎落星之樓是也今石步相去一里半有落星墩里俗相傳即當時建樓處今去城四十里

烽火樓

圖經云在石頭城西南最高處楊修之詩注云沿江築臺以舉烽燧自建康至江陵五千七百里有警半日而達按南史宋文帝元嘉二十七年魏太

武至瓜步聲欲渡江始議北侵朝士多有不同至是帝登烽火樓極望不悅謂江湛曰北伐之計同議者少今日貽大夫之憂在予過矣又齊武帝登烽火樓詔羣臣賦詩蕭穎胄詩合旨帝謂穎胄曰宗室便不乏才

入漢樓

東晉書云義熙八年於石頭城東起入漢樓在城西門外

景陽樓

輿地志云宋元嘉二十二年築至孝武大明中紫雲山景陽樓因名之今法寶寺西南遺址尚存

周處臺

寶章閣藏版

府雉東南有故臺基曰周處臺今鹿苑寺之後梅摯記云按西晉史處字子隱義興陽羨人弱冠時好馳騁不修細行州曲患之自知為衆所惡慨然有改勵之志里人以三害切諷於是射虎斬蛟往見陸雲具以誠告雲曰古人學道貴朝聞夕死君前途尚可第患志之不立何憂名之不彰遂退而嚮學有文言必信行必謹如是期年州府交辟仕吳為東觀左丞吳平入洛界遷郡太守率有善狀拜御史中丞凡所糾劾不避權貴卒樹功名沒世遠耀噫天地至大根一氣陶萬化未始無過陰陽寒暑小有繆戾則從而改之卒歸大化而况於人乎古聖賢本天地之性以修其性亦未嘗諱過後

之人不獨諱之而已抑又從而文之自底悔尤良可嗟惜惟子隱少而不逞長乃自悟一旦番然去惡即善遂爲名世忠賢可不重乎則中人所稟因物染遷爲時註誤德有小善言有小疵未甚子隱之害於而鄉又何憚改爲哉子因表是臺新是堂非止卜高明之居包遊覽之勝而與民同樂亦將有激時世云

衛玠臺

晉書云玠字叔寶初宰豫章南辭王敦歸建業都人聞其姿容觀者如堵尋以疾終年二十七時人謂之看殺葬江寧楊修之有詩云年少才非洗馬才珠光碎後玉光埋江南第一風流者無復羊車

寶章閣藏版

過舊街其臺傳在城南十里

九日臺

南史齊武帝永明四年四月作商飈館於孫陵岡世呼爲九日臺十道四番志云武帝九月九日以宴羣臣孫陵岡即吳大帝蔣陵今在鍾山鄉蔣廟之西南俗呼爲松陵岡去縣十二里楊修之有詩云甲光如水戟如霜御酒杯浮菊半黃東日西風滿天仗簫韶一部奏清商

雨花臺

梁武帝時有雲光法師講經於此感得天雨賜花天廚獻食荆公有詩云盤互長干有絕陁并包佳麗入江亭新霜浦淑絲靜薄晚林巒往往青楊

無爲有詩云空書來震旦康樂造淵微貝葉深山
譯曼花半夜飛香清雖透筆蕊散不露衣舊社白
蓮老遠公應望歸

梁昭明書臺

舊傳梁昭明太子著書於此今遺址尚存蔣山定
林寺後山北高峯上

新亭

晉初元帝渡江僕射周顛與羣臣遊宴坐中歎云
雖風土不殊舉目有山河之異因而流涕王導曰
諸公當須戮力中原以壯王室何爲作楚囚悲邪
衆皆肅然整容宋孝武即位於新亭僕射王僧達
改爲中興亭去城西南十五里附近江渚楊修之

有詩云滿目江山異洛陽北人懷土淚千行不如
亾國中書令歸老新亭是故鄉

五馬亭

晉元帝與彭城王元西陽王羨南頓王宗汝南王
宏南渡之後當時讖云五馬浮渡江一馬化爲龍
謂此也亭今廢其地屬金陵鄉去城西二十五里
幕府山之側

東冶亭

晉太元中於汝南灣東南置亭爲士大夫餞送之
所揚修之有詩曰忍淚相看酒共持一生心事幾
人知年年折盡東亭柳此別縣縣無盡期舊傳在
縣東八里

白下亭

李白金陵白下亭留別詩云驛亭三楊樹正當白下門王荆公有詩云東門白下亭摧壁蔓寒葩則亭在東門明矣荆公舊宅在今報寧寺故基其詩有門前秋水可揚舫有意西尋白下亭之句今廢矣

翠微亭

在城西五里清涼寺山頂南唐時建林逋有詩云亭在江干寺清涼更翠微陳軒金陵詩集注云清涼寺翠微亭最爲佳處

賞心亭

丁晉公謂所建也公以家藏袁安卧雪圖張於其

屏乃唐周昉筆經十四太守無敢覬覦者後爲一太守以凡筆畫蘆雁易之王琪密學來作守登臨賦詩曰千里秦淮在玉壺江山清麗壯吳都昔人已化遼天鶴舊畫難尋卧雪圖冉冉流年去京國蕭蕭華髮老江湖殘蟬不會登臨意又噪西風入坐隅荆公有詩云檻折簷傾野水傍臺城佳氣已消亾難披草莽尋千古獨倚青冥望八荒坐覺塵沙昏遠眼忽看風雨破驕陽扁舟此日東南興欲望江流萬里長又詩云霸氣消磨不復存舊朝臺殿只空邨孤城倚薄青天近細雨侵尋白日昏稍覺野雲成晚霽卻疑山月是朝暎此時江海無窮興醒客無言醉客喧

三山亭

在城西五里清涼寺石頭城之西面對三山其地屬金陵鄉

儒學館

南史宋文帝元嘉十五年立儒學館於北郊命雷次宗居之即今覆舟山之南也

湯泉館

徐鉉有湯泉舊館詩今遺基尚存在神泉鄉湯山之下

儀賢堂

建康實錄吳時造號為中堂揚修之詩注云在臺城內梁武帝謙恭待士大通中有四人來年七十

寶章閣藏版

餘鷄衣躡履行丐經年無人知者帝召入儀賢堂給湯沐解御服賜之帝問三教九流及漢書事了如目前帝心異之舉朝無識者惟昭明太子識而禮重之四人喜揖昭明如舊交時目之為四公子揚修之有詩云兩兩鷄衣白髮翁經筵談柄坐生風昭明太子歡相得應與商山四皓同

聽箏堂

晉孝武帝幸謝安宅命讌安侍坐使桓伊吹笛為一弄畢又撫箏按徽金滕曲聲節慷慨俯仰可觀安淚下露襟乃越席將其鬚曰使君於此不凡帝甚有媿色此堂基至今樵采者不敢近揚修之詩云鴈柱鸞絃十有三南山安石位巖巖逡巡奏罷

金滕曲堂上露襟歎不凡

袂襖堂

楊修之金陵詩注云在縣北五里臺城內天淵池架石引水為流杯之所六朝上巳日宴錫公卿於此輿地志云宋元嘉二十二年鑿天淵池造景陽樓今法寶寺之南有景陽樓古基側有池舊傳即天淵池歲久湮沒今不復有堂矣

蠶堂

隸縣北七里者閨寺前沙市中六朝皇后親蠶之所也楊修之詩云摘繭抽絲女在機茅簷葦箔舊堂扉年年桑柘如雲綠翻織誰家錦地衣

三閣

寶章閣藏版

陳後主至德二年於光昭殿前起臨春結綺望仙三閣高數十丈竝數十間其窗牖戶壁欄檻之類皆以沈檀為之又飾以金玉間以珠翠外施朱簾內設寶帳其服玩之屬瑰麗皆近古所未有每微風至香聞數里朝日初照光映後庭其下積石為山引水為池植以奇樹雜以花藥後主自居臨春閣張麗華居結綺閣麗華本兵家女以織筵為業龔孔二貴妃居望仙閣竝復道交相往來以宮人有文學者袁大捨等為女學士後主每引賓客江總等對貴妃遊宴則使諸貴人及女學士與狎客賦詩互相贈答采其尤豔麗者以為詞被以新聲采宮女有容色者千百數習而歌之分部迭進持以相樂其曲

有玉樹後庭花臨春樂等麗華聰慧有神采嘗於閣上靚妝臨於軒檻宮中遙望飄若神仙才辯強記善候人顏色薦諸宮女後宮咸德之又工厭魅之術假鬼道以惑後主置淫祀於宮中聚諸女巫使之鼓舞時後主怠於政事百官啟奏竝因宦者蔡臨兒李善度進請後主每置張麗華於膝上共決之大臣有不從者因而譖之言無不聽於是張孔之權熏灼四方内外交結貨賄公行賞罰無常綱紀替亂矣及隋軍克臺城二妃與後主俱入井隋軍出之晉王廣命斬之於青溪柵下北史高頴傳隋平陳晉王廣欲納張麗華頴曰武王伐紂戮妲己今陳平不宜取麗華乃命斬之當以北史爲

寶章閣藏版

正

馳道

宋孝武帝作馳道自閭闔北出承明抵真武湖十餘里爲調馬之所也楊修之有詩云路平如砥直如絃官柳千株拂翠煙玉勒金羈天下駿急於奔電更揮鞭

層城觀 一名穿鍼樓

輿地志云齊武帝七月七日使宮人集此是夕穿鍼以爲乞巧之所亦曰穿鍼樓在臺城內楊修之有詩云秋星如彈月如梳宮妓香添乞巧鑪萬縷千鍼同一意眼穿腸斷得知無

齊雲觀

陳後主禎明二年建在臺城內國人歌曰齊雲觀
寇來無際畔楊修之詩云上界笙歌下界聞縷金
羅袖鬱金裙倚欄紅粉如花面不見巫山空暮雲

桂林苑

寰宇記云桂林苑在縣北落星山之陽左太冲吳
都賦云數軍實乎桂林之苑即此地也

樂遊苑

輿地志云在晉爲藥園宋元嘉中以其地爲北苑
更造樓觀後改爲樂遊苑宋孝武帝大明中造正
陽林光殿於內梁侯景之亂焚毀略盡陳天嘉六
年更加修葺陳亡遂廢又按建康實錄宋文帝元
嘉十一年三月禊飲於樂遊苑會者賦詩顏延之

寶章閣藏版

爲之序南史梁大通三年武帝幸樂遊苑時新造
兩刀稍長二丈四尺圍一尺三寸帝因賜羊侃何
南國紫騮馬試之侃執稍上馬左右擊刺特盡其
妙觀者登樹樹俄而折因號其稍爲折樹稍及陳
宣帝即位北齊使常侍李詢駮來聘賜宴樂遊苑
尚書令江總作詩以贈之寰宇記云其地在覆舟
山南去縣六里

上林苑

南史宋孝武大明三年於真武湖北立上林苑建
康實錄云在縣北十三里有古池俗呼爲飲馬塘
楊修之詩注云其苑連雞籠山在縣北七里
芳林苑

寰宇記云芳林苑一名桃花園本齊高帝舊宅在府城之東秦淮大路北武帝永明五年嘗幸其苑楔宴王融曲水詩序云載懷平浦乃眷芳林蓋謂此也又按南史齊時青溪宮改爲芳林苑梁天監初賜南平元襄王爲第益加穿築果木珍竒窮極雕靡命蕭子範爲之記蕃邸之盛無以過焉

芳樂苑

齊東昏侯方在位時與宮人於閱武堂元會皇后正位闈人行儀帝戎服臨視又於閱武堂爲芳樂苑窮竒極麗多種樹木日與潘妃放恣褻瀆不可言明帝崩竟不一日蔬食居處衣服無改平常潘妃生女百日而止制斬衰杖經衣悉麤布羣小來

弔盤旋坐地舉手受執蔬膳積旬不聽音樂左右直長闈豎等共營者羞爲天子解菜又於苑中立店肆模大市日游市中雜所貨物與宮人闈豎共爲裨販以潘妃爲市令自爲市吏錄事將鬪者就妃罰之帝小有得失潘則杖之開渠立埭躬自引船埭上設店坐而屠肉於時百姓歌云閱武堂種楊柳至尊屠肉潘妃酤酒

六朝事迹編類卷之四終

光祿寺署正上元李濱古漁重校刊

六朝事迹編類卷之五

左奉議郎充江南東路安撫司幹辦公事張敦頤養正撰
江河門 溝渠溪井附

大江

西接江寧界東接句容界北接真州六合縣界沿
流一百二十里按三國志吳書魏文帝有渡江之
志徐盛從建業築圍上設假樓江中浮船文帝到
廣陵望圍愕然彌漫數百里而江水盛長便引還
文帝歎曰魏雖有武騎千羣無所用也又按江南
野史周世宗問孫忌江南虛實忌曰長江千里險
過湯池可敵十萬之師世宗聞而忌之

秦淮

秦始皇東巡會稽經秣陵因鑿鍾山斷金陵長隴
以疏淮隴乃方山也長其淮本名龍藏浦上有二
源一源發自華山經句容西南流華山在句容縣界高九里似蔣
山一源發自東廬山經溧水西北流入江寧界廬東
山在溧水縣東南十五里高六十八丈周回二十里山西一源入秦淮二源合自方
山埭西注大江其分派屈曲不類人功疑非秦皇
所開而後人因名秦淮者以鑿方山言之楊修之
有詩曰一氣東南王斗牛祖龍潛為子孫憂金陵
地脈何曾斷不覺真人已姓劉

直瀆

吳後主孫皓所開隸鍾山鄉去縣三十五里西至
霸埂東北接竹港流入大江楊修之詩注云瀆在

寶章閣藏

幕府山東北長十四里闊五丈深一丈初開之時
晝穿夜復自塞經年不就傷足役夫卧其側夜見
鬼物來填因嗟歎曰何不以布囊盛土棄之江中
使吾徒免殫力於此傷者異之曉白有司如其言
乃成瀆道直故名曰直瀆輿地志曰白下城西南
有蟹浦蟹浦西北有直瀆伏滔北征記云吳將甘
寧墓在此俗云墓有王氣孫皓惡之乃鑿其後為
直瀆又按晉書蘇峻舉兵温嶠帥師救京師遣王
愆鄧期兵為前鋒次直瀆即此地也楊修之有詩
曰晝役人功夜鬼功陽開陰闔幾時終不聞擲土
江中語爭得盈流一水通

橫塘

吳大帝時自江口沿淮築隄謂之橫塘楊修之有詩云早潮纔過晚潮來一一軒窗照水開鑑面無塵風不動分明倒影見樓臺

青溪

建康實錄吳赤烏四年冬鑿東渠名爲青溪寰宇記云青溪在縣東六里闊五丈深八尺以洩真武湖水輿地志云青溪發源鍾山入於淮連綿十餘里溪口有埭埭側有神祠曰青溪姑今縣東有渠北接覆舟山以近後湖里俗相傳此青溪也其水迤邐西出至今上水閘相近皆名青溪陶季直京都記云京師鼎族多在青溪埭尚書孫瑒尚書令江總宅當時竝列溪北又南史齊永明元年望氣

者言新林婁湖有王者氣帝迺築青溪舊宮作新林婁湖苑以厭之又建康實錄云郝僧施泛舟溪中每經一曲作詩一首隋煬帝平陳斬張麗華孔貴嬪二人於此柵下楊修之有詩云傾城傾國兩妃嬪此地聞名不見人潛想舊時紅粉面落花風裏步香塵

潮溝

輿地志潮溝吳大帝所開以引江潮建康實錄云其北又開一瀆北至後湖以引湖水今俗呼爲運瀆其實自古城西南行者是運瀆自歸善寺門前東出自青溪者名潮溝其溝向東已湮塞西則見通運瀆按實錄所載皆唐事距今數百年其溝曰

益湮塞未詳所在今府城東門外西抵城濠有溝東出曲折當報寧寺前里俗亦名潮溝此近世所開非古潮溝也

霹靂溝

王荆公詩云霹靂溝西路柴荆四五家憶曾騎款段隨意入桃花在城東五里

北渠

吳後主引北湖水入宮城巡遶堂殿窮極機巧費役萬工楊修之有詩云金殿分來玉砌流黑龍湖撒鳳池頭後庭花落恩波斷翻與南唐作御溝在城北二里

蟹浦

寶章閣藏版

輿地志云白下城西南有蟹浦源出鍾山北流九里入大江在城西北十六里

覆杯池

晉元帝中興頗以酒廢政丞相王導奏諫帝因覆杯於池中以為誡楊修之有詩云金杯覆處舊池枯此後還曾一醉無東晉中興股肱力元皇亦學管夷吾今城北三里西池是也

落义池

蔣山寶公塔之東悟真菴前舊傳迦毗羅神與隋梵僧密多至此交戰神落义於此池因以得名

石池

臺城内千佛禪院本梁同泰寺後吳順義二年置

院前有醜石四各高丈餘名三品石西有白蓮閣閣下有小石池面方一丈餘言是陳時景陽井今有古石井欄其上本鐫刻文字悉已殘毀惟戒哉二字可辨今名法寶院楊修之有詩曰蘿蔓藤花歲自添露痕還似雨痕露莫將廢苑爲閒地猶可巖巖使具瞻

邀笛步

舊名蕭家渡在城東南青溪橋之右今上水閘是也晉書云桓伊善樂盡一時之妙爲江左第一有蔡邕柯亭笛常自吹之王徽之赴召京師泊舟青溪側伊素不與徽之相識自岸上過船中客稱伊小字曰此桓野王也徽之令人諭之曰勝聞君善吹笛爲我一奏伊是時貴顯素聞徽之名便下車踞胡牀爲作三調弄畢便上車去客主不交一言故今名爲邀笛步也

太子湖

吳宣明太子孫登所創謂之西池晉元帝即位明帝爲太子更加修之多養武士於池內築土爲臺時人呼爲太子西池建康實錄晉太元十年夏四月符堅爲姚萇慕容冲所逼遣使求救詔太保謝安率衆救秦帝自行西池宴羣臣餞安在城北六里周回十里

迎擔湖

南徐州記云費縣西北八里有迎擔湖昔晉元嘉

中元帝南遷衣冠席卷過江客主相迎湖側遂以此為名在府北五里石城後其湖溉田三十里

蘇峻湖

南徐州記云迎擔湖西北有蘇峻湖本名白石陂建康實錄晉成帝咸和二年蘇峻舉兵逼帝遷於石頭陶侃溫嶠庾亮陣於白石使將軍楊謙攻峻於石頭峻輕騎出戰謙詐北奔白石壘峻逼之纔交鋒峻墜馬侃督護李陽臨陣斬峻於白石陂岸至今呼此陂為蘇峻湖在城西北十五里周回十里

半陽湖

輿地志云江乘縣南有半陽泉半冷半熱又南徐

州記云江乘縣南有半陽泉半冷半熱熱處可爛物冷處如冰熱處魚入冷處即死冷處魚入熱處亦死民種稻則既熱水一年再熟今廢楊修之有詩云江南龍節水為鄉水不純陰又半陽一片湖光共深淺兩般泉脈異溫涼在城東北四十里周回十五里

絳巖湖

圖經云在句容縣西南三十里源出絳巖山周回二十里溉田一百頃舊收歲課錢二百二十貫咸平三年正月奉敕除放

固城湖

圖經云水路在溧水縣南九十五里周回一百里

東西二十五里南北三十里有四派東經五堰經
常州宜興縣界入太湖

丹陽湖

圖經云在溧水西八十里周回一百九十五里與
太平州當塗縣分界昔唐李白常遊此湖酷愛其
景乃張帆載酒縱意往來而作詩曰湖與元氣連
風波浩難止天外賈客歸雲間片帆起龜遊蓮葉
上鳥送蘆花裏少婦棹輕舟歌聲逐流水

溧陽源

圖經云在縣西北二十三里曹姥山西經溧水縣
東流入縣界又南流三十里入長塘湖一名瀨水
吳越春秋云伍子胥奔吳至瀨渚遇女子因跪乞

食女食之授以壺漿誠曰勿言既濟女已投水後
子胥伐楚還投金於瀨水以報之須臾有嫗行哭
而來曰吾女三十不嫁遇窮人食之投水而死乃
取金以歸水次有碑李白文

麾扇渡

圖經云在縣東南四里故朱准航之左晉廣陵相
陳敏反南渡江時假顧榮丹陽內史榮發舟南岸
敏率衆萬餘人出不獲濟榮以白羽扇麾之其軍
遂自潰因以爲名也楊修之有詩云旌旗爍日刃
凝霜甲馬如龍人似狼羽扇一麾風偃草策勲多
謝顧丹陽

五馬渡

圖經云在縣西北二十三里幕府山之前晉元帝與彭城等五王渡江處按晉書太安之際童謠云五馬浮渡江一馬化爲龍及永嘉中元帝登大位乃其符云五馬之名取此

桃葉渡

圖經云在縣南一里秦淮口桃葉者晉王獻之愛妾名也其妹曰桃根獻之詩曰桃葉復桃葉渡江不用楫但渡無所苦我自迎接汝不用楫者謂橫波急也嘗臨此渡歌送之楊修之有詩云桃葉桃根柳岸頭獻之才調頗風流相看不語橫波急艇子翻成送莫愁

白鷺洲

寶一平閣藏版

圖經云在城西南八里周回十五里對江寧之新林浦唐李白詩云三山半落青天外二水中分白鷺洲

長命洲

梁武帝放生之所也在石頭城前帝日市鵝鴨雞豚之屬放此洲名爲長命洲置戶十家常以粟穀餵飼歲各千石而爲狐狸所食及掌戶竊而烹者各半輿地志魏使李恕來聘帝時於此放生問恕曰北主頗知此事乎對曰魏國不殺亦不放帝無以應之楊修之有詩云梁武慈悲不鼎烹蒙恩養亦虛名狐狸口腹應潛飽就死多於日放生

葛仙丹井

仙翁葛玄煉丹井也按建康實錄吳大帝好道術
玄嘗與遊處後玄白日昇天其井尚存外有石欄
相傳云南唐所造今去城四十里方山頂上是也

應潮井

蔣山頭陀寺中塔記云梁大同元年後閤舍人石
興造山頂第一峯佛殿後有一井泉與江潮盈縮
增減相應揚修之有詩云碧甃時時滅復增山頭
海面密相應古來泉脈誰穿鑿潮落潮生不暫澄

景陽井 一名胭脂井

臺城中景陽宮井也按南史隋克臺城陳後主與
張麗華孔貴嬪俱入井隋軍出之故杜牧之詩云
三人出胥井謂此也其井有石欄上多題字舊傳

云欄有石脈以帛拭之作胭脂痕或云石脈之色
類胭脂故云圖經不載揚修之有詩云擒虎戈矛
滿六宮春花無樹不秋風倉黃益見多情處同穴
甘心赴井中唐李白金陵歌曰石頭巉巖如虎踞
凌波欲過滄江去鍾山龍盤走勢來秀色橫飛歷
陽樹四十餘帝三百秋功名事迹隨東流白馬小
兒誰家子秦清之歲來關囚金陵昔時何壯哉席
卷英豪天下來冠蓋散爲雲霧盡金輿玉座成寒
灰扣劍悲吟空咄嗟梁陳白骨亂如麻天子龍沈
景陽井誰歌玉樹後庭花此地傷心不能道目下
離離長春草送爾長江萬里心他年來訪商山皓

藏冰井

覆舟山上有凌室乃六朝每歲藏冰於此也楊修
之有詩云尤喜凌人職未墮閉藏出納示箴規戰
競國步艱難者常似臨深履薄時在城東北十里

六朝事迹編類卷之五終

光祿寺署正上元李濱古漁重校刊

